

EL A PASAMI: NO LAGUE PASA CU BO: BO HIPOTECA

Na final di November, mi a haya un nota di banco riba mi **Hipoteca**, y cu mi debe algun mil florin.

E cos aki a strañami, pasobra december mester ta mi ultimo pago despues di 15 luna deseando pa e fecha aki yega por fin.

Mi a papia cu e oficial bancario cu semper a atende mi asuntonan, pero net e tabata baha cu vacacion, y a keda cu mi lo papia cune despues cu e bolbe.

Mi no a haya tempo pa yega cerca dje, y a dicidi di laga e cuenta core numa por lo pronto.

Diamars, mi a haya yamada di otro oficial bancario, y el a pidimi pa bin regla asunto di e tanto milnan ey.

Kico a resulta? Ora mi a kere cu mi ta stop di paga mi **Hipoteca** fin di december 1997, a resulta cu mi tin 6 pa 8 luna mas o menos pa paga ainda, na **Interes**.

Ora mi a haya mi splicacion extenso y cu masha pasenshi di henter e asunto, mi a bise: "E cos aki mi tin cu publica, pasobra el a pasami, y mi tin cu avisa **TUR** hende cu tin hipoteca, pa nan tene cuenta cu esaki, pa no pasa nan mescos cu a pasami".

Esey ta loke mi ta haciendo aki.

Si bo tin **Hipoteca** na banco, y e fecha di pago ta stipula pa 30 di luna, percura pa bo a pague **promé cu 30 di luna**.

Asina bo pago pasa 1, 2, 3 of mas dia, e dianan aki ta conta y interés ta wordo cobra riba nan.

No ta importa si ta diasabra, diadomingo of dia di fiesta, ta dia 30.

E machine cu ta registra esakinan no ta tene cuenta cu fin di siman y dia di fiesta.

E conoce solamente dia 30.

Despues di tanto aña pagando "**sagradamente**" tur luna, aunke ta riba dia 1,2,3, of 4 of poco mas, bo ta bin haya bo finalmente cu tanto miles di interes pa paga, pasobra bo a surpasa fecha di 30.

Lo ta bon pa tur hende cu tin **Hipoteca**, tene cuenta cu esaki, pa no pasabo mescos cu a pasami. Banco por bise: "**Bo tabata sa**".

Pero banco mester pensa tambe cu ora cu un persona, of un pareha ta sinta dilanti oficial di banco, cu ansha pa haya un **Prestamo**, of un **Hipoteca**, ta e **Prestamo** of **Hipoteca** nan kier.

Nan kier tende si nan ta haye, of si nan no ta haye.

Ora duna splicacion di kico ta kico, esey ta drenta un banda sali otro banda, pasobra nan ta asina contento di a logra haya locual nan a bin busca, sin cu nan a scucha esaki of esaya.

Pero lo ta bon tambe pa banco yama e clientenan cu a bira "**Delinquent**" y splica nan kico ta pasando cu nan pagamento.

No djies manda bisa cu "**bo Hipoteca awe ta para riba tanto**" etc.

E contacto personal ta masha importante pa clientenan.

Si mi a rabia? Na prome instancia si! Pero despues mi a bisa cu, kizas mi a wordo splica 15 aña pasa di esaki, y e no a drentami, of kizas **NUNCA**, pero banco semper por bisa cu **SI** nan a splicabo.

Pues..... mi tin cu sigui mula algun luna mas pa banco, y..... riba e placa aki, atrobe interes ta wordo conta tambe, y si no paga na tempo, ainda tin chance cu nan por pone beslag riba bo cas si bo no cumpli.... Tene cuenta cu e cosnan aki si bo tin **Hipoteca**, y busca pa sa kico ta kico, prome cu bo perde tur cos.

E OTRO COS: NO LAGUE PASA CU BO TAMBE:

NUMBER DI AUTO: FISCAL NO TA HACI WEGA

E otro cos cu a pasami, cu mi ta adverti tur hende pa no lague pasa cu bo tambe, ta asunto di **Number di Auto**.

Na final di november mi a ripara cu mi plaatchinan chiquito di number di auto a desaparece.

Mi a core algun dia mas sin e plaatchi chiquito, y como cu mi fecha di aseguro ta yegando, mi a spera te e dia ey pa regla mi asuntonan.

Dia 4 di december, mi a bay banco, paga tur mi aseguronan, incluso mi aseguro di auto. (si no bo no ta haya plaatchi nobo di number di auto).

Awor mi tin mi number di auto paga te fin di juni 1998, y mi a sintimi mas tranquil.

Mas tranquil?

Wel... e dianan sin e plaatchi chiquito tabata tin mi poco intranquil, y

despues cu mi a paga mitar aña 1998 mi a sintimi poco mas tranquil. Mi a papia cu varios polis conoci, y un polis retira, riba e asunto di core sin e plaatchi chiquito.

"**Ta djies un controle-plaat e ta. Si bo number ta paga bo no tin nada di preocupa**", mi a ser bisa. Mi tabata poco mas tranquil atrobe.

..... Diripiente, polis a parami pariba di Hotel Sonesta.

E agente **Nobis Nobis**, un tal **Sr. Slikker** si mi no ta equivoca, fresco riba caya despues di mas o menos un luna cu el a gradua, a dicidi di duna e chofer veterano chubato bieuw aki un procesverbaal.

Mi a dicidi di play tough y a splike cu mi a wordo bisa cu ta controle plaat, cu mi number ta paga manera e por mira pa henter aña 97, y cu mi number di mitar aña 98 tambe ta paga, cu mi numbertan ta poni unda nan mester ta riba e auto, manera ta stipula, etc.

Sr. Slikker (dispensami si mi no a skirbi e nomber corecto), masha tranquil, cu bon manera y decentemente (ta ken di cu nos jovennan no tin respet?) a splicami cu mi mester a bay denuncia cu mi numbertan a wordo horta.

Cu boca grandi, fresco, manera un macho man, mi di cune: "**kico mi ta bay haci na denuncia robo di mi plaachinan, si ni ora cu sospechosonan ta conoci, recherche no ta sali?**"

El a para riba cu mi mester a bay denuncia y haya un papel cu ta referi riba esaki.

"**Pero Señor, tur cos ta paga, ta un controle plaat e ta.....**" mi a sigui.

Nos agente joven, cu masha tranquilidad a contesta: "**Meneer, decreto 1988, GT 23 (of ta 43) ta duna splicacion bon cla riba e asunto di plaatchi. Meneer por laga controla esaki**".

Mi a haya un procesverbaal, y a dicidi di bay controla toch locual e meneer a bisami.

(**NOTA: tene cuenta cu na momento di skirbi esaki, kizas e GT 23 of ta 43 no ta corecto, pasobra mi no tin e mi dilanti pa controla na e momento aki.**)

Pa mi mala suerte, ora cu a bay controla, a bin resulta cu **Sr. Slikker** tabata tin tur razon di mundo y cu e no a equivoca ningun momento den su decreto y articulo di ley.

Pa esaki mi mester kita sombre pa e opleiding cu e jovennan aki ta haya y pa e inteligencia di e shon aki. **Mi BOET tabata na su lugar.**

E advertencia pa lectornan: Ora yega momento pa bo core cu bo plaatchi chiquito, percura bo tin e plaatchi chiquito pega hunto cu e plaatchi grandi. E ta forma un totalidad.

Si bo tin e grandi so, ta ser considera cu bo no ta cumpli cu ley, pasobra e chiquito **MESTER** ta cune. No kere cu pasobra bo a paga henter aña caba bo por core sin e plaatchi chiquito. No kere cu si bo tin e plaatchi den dashboard of riba dashboard bo ta safe...

E number mester ta pega na su lugar destina, segun ley y tur procesverbaal relaciona cu esaki ta corectamente duna tambe.

Fiscal no ta haci wega cu su reparticion di boetnan, pues percura bo ta cumpliendo.

Sr. Slikker, pabien, bon trabao haci cu mi, sigui asina den bo carera policial y lo bo yega leeuw!!

E WEGA DI CONTROL:

Mi tin cu menciona si e mal ehemplo cu a drenta mi cabez despues di e procesverbaal, pasobra mi kier a proba mi mes.

Meneer agent a bisami cu mi mester a denuncia y mi a conteste locual ta skirbi mas ariba. Kico mi a haci?

Pa malo mi a presta dos plaatchi chiquito di un conoer di mi cu no ta usando su auto cu ta dañá.

Mi a core varios dia, pasando unda control di trafico ta tumando lugar. Mi a pasa dilanti polisnan controlando, y hasta para 1 pa 2 meter dilanti polisnan.

Ningun momento di e siman ey, pasando 7 lugar di control, ningun polis a cay ariba cu mi number grandi ta menciona un cos y mi plaachinan chiquito ta menciona otro cos.

"**T'asina mi mester a denuncia pa recherche investiga, cual di e 50 mil vehiculonan riba caya ta coriendo cu mi plaatchi chiquito?**"

..... Esaki a bolbe pasa den mi cabez.

July

ATV 15 lo briya e fin di siman aki

ORANJESTAD (AAN): Cu eleccion di Reina Hubenil diabierna awor, ATV ta sigui cu nan transmisionnan live di Carnaval 44.

ATV 15 lo cuminsa su transmision pa 8'or di anochi. Atrobe nan lo bay ta presente

cu nan elenco profesional cu ta bay ofrece e teledivertenan e mihor calidad di programacion cu bo por spera di e canal.

Presentacion lo ta na encargo di Tessa Pieters y Cheryldine Muller cu siman pasa,

durante di Eleccion di Reina Infantil, a demostra cu nan por cautiva y deleita nos pueblo cu nan comentarionan profesional y dinamico. Tambe a keda proba cu nos super Ruben "Scorpio-Riba-

Bow" Garcia no por falta den nos elenco. E lo ta presente atrobe back-stage pa asina teledivertenan por sigui e preparativonan cu ta tuma lugar promer cu e candidatanan subi stage.

"Mr. Riba-Bow" lo bay tin entrevistanan cu e personanan cu a contribui cu trahe, make-up y choreografia di e candidatanan. Pa e mihor cobertura, sintonisa ATV 15 sin falta!